

Najib dirai Putera Charles sempena penganugerahan Piagam Diraja

Utusan Online

14 Mei, 2012

Oleh Zaini Hassan

LONDON 13 Mei - Perdana Menteri, Datuk Seri Najib Tun Razak akan diraikan oleh pewaris takhta Britain, Putera Charles di Istana St. James Selasa ini, sempena penganugerahan Piagam Diraja ke atas Pusat Pengajian Islam Oxford (OCIS) oleh Ratu England.

Charles ialah penaung OCIS, sementara Najib pula ialah ahli majlis tertinggi pusat itu.

Malaysia adalah antara negara, selain beberapa negara Arab yang banyak menyumbang kepada pusat pengajian itu. Ia ditubuhkan pada 1985 di Universiti Oxford bagi menggalakkan pengajian kesarjanaan Islam dan dunia Islam. Ia ditadbir oleh sebuah Lembaga Amanah yang terdiri daripada para sarjana, negarawan dari beberapa buah negara, selain wakil universiti itu.

Malaysia turut aktif dalam pembinaan sebuah pusat baru OCIS serta sebuah dewan yang akan dikenali sebagai Auditorium Malaysia. Auditorium itu turut dihiasi dengan ukiran kayu Melayu.

Menurut, Pesuruhjaya Tinggi Malaysia ke United Kingdom dan Eire, Datuk Seri Zakaria Sulong, Najib dan isteri, Datin Seri Rosman Mansor berada di sini selama dua hari sempena lawatan kerjanya.

Najib yang terbabit secara langsung dalam OCIS pernah memberi ceramah mengenai Kefahaman Sederhana dan Antara-Tamadun.

"Kita amat dihargai di atas penglibatan dalam pembangunan pusat baru OCIS, kita juga mempunyai ahli akademik dan felo yang mengajar di pusat itu. Banyak yang berjaya dilaksanakan hasil penglibatan dari Malaysia," kata Zakaria.

Beliau menambah, hubungan dua hala Britain dan Malaysia cukup mesra terutamanya selepas terbentuknya kerajaan campuran pada 2010.

Najib sendiri telah mengadakan lawatan rasmi ke negara ini tahun lalu, diikuti oleh lawatan balas Perdana Menteri Britain, David Cameron, April lalu.

Sempena dengan sambutan Jubli Intan pemerintahan Ratu Elizabeth tahun ini, Seri Paduka Baginda Yang di-Pertuan Agong dan Raja Permaisuri Agong akan menghadiri sambutan itu tidak lama lagi atas jemputan Ratu.

"Ini menunjukkan betapa rapatnya hubungan kedua-dua hala, dan ia sangat-sangat menggalakkan," kata Zakaria.

September ini, Duke of Cambridge, Putera William dan isterinya, Kate Middleton akan melawat Malaysia bagi membuka Kolej Mulborough di Johor.

Sempena lawatan kerja Najib ke sini, menurut Zakaria, Perdana Menteri juga akan melancarkan sebuah pertubuhan bukan kerajaan, Sahabat Barisan Nasional UK (FBNUK) di House of Lords pada hari pertama kunjungannya.

Ahli-ahli FBNUK terdiri daripada rakyat Malaysia di negara ini dan juga di Malaysia yang akan menjadi sebuah pusat setempat bagi aktiviti kemasyarakatan dan perniagaan.

Selain itu, satu lagi acara menarik Najib di sini adalah Sepetang Bersama Perdana Menteri, yang akan menghimpunkan rakyat Malaysia di United Kingdom untuk bertemu dan beramah mesra dengan Najib. Ia akan diadakan di The O2 Arena di Greenwich, Timur London.

Perdana Menteri dan isteri akan berlepas dari UK ke Amerika Syarikat untuk satu lagi lawatan kerja sebaik sahaja selesai majlis di Istana St. James. - Utusan

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0514&pub=Utusan_Malaysia&sec=Dalam_Negeri&pg=dn_03.htm